

樊南文集補編

冊

一

歐陽文忠公集

樊南文集補編

四
特
藏
版

四部備要

集部

上海中華書局據原刻本

校刊

桐鄉 陸費達 總勘

杭縣 高時顯 輯校

杭縣 吳汝霖 校

杭縣 丁輔之 監造

樊南文集補編序

同年生錢楞仙少司成少躋通顯壯年勇退覃精博洽海內宗之同治壬戌余承乏漕河延君主講崇實書院君循循善誘條晰其良楷而殿最之不及期年士風丕變公餘之暇朝夕過從飫聞緒論益歎君之才有不盡於是者而夷然沖澹獎掖後學爲尤不可及也君於書無所不窺隨手箋記皆成條理尤好樊南李氏之學嘗以馮氏採本未盡賅備因手錄全唐文所收二百三篇與哲弟筴仙廣文分任箋注之役既有成書閒以示余博而不雜簡而能該參伍鉤校絕非苟作諷玩再四愛不去手爰付手民以廣流布使士林讀之知精能於藝文者必根柢乎經史其亦知所嚮往矣

同治五年歲次丙寅秋八月盱眙吳棠撰

發願文

原序

稽文泉一冊半佚太元擬易之經訂昭諫八編尙遺秋雲如羅之賦自昔零珠錯落斷璧沈霾亶歸搜燼於哀餘不致終淪於韋擲然亦孤蘭之偶閱匪如唐棣之都刪從未有網羅前聞紬繹墜緒叢殘失次方嗟舊誥俄空爛脫無嫌頓喜全篇跳出以云補亡斯稱憲古已樊南甲集編於大中元年丁卯商隱方爲鄭亞掌書記時乙集則編於七年癸酉在盧宏正東川幕中卷各二十體皆四六攷唐志而僅羸一卷之作按宋史而遞增八卷之繁嗣是岷體真傳贗鼎易混禮堂手寫足本無聞朱長孺彙收之而尙待於徐補顧俠君甄采之而尤備於馮箋世之吮素麟毫妃青螺黛莫不家藏緝

帙人握靈珠謂可綜金鑰之樞鈐匯玉溪之支派
矣然而河東有辟書之任何以作奏偏稀濮陽有
重祭之文何以前篇不錄安陽府君爲明德所自
出而未聞敘述清芬令狐相公會屢啓以陳情而
不復留存隻字疑有瓊瑰之寶莫垂竹帛之光資
擲掇於藝林庶挾張於文苑我同歲生楞仙太史
榮躋甲觀博覽丁函鳳髓龍筋早冠承明之鉅製
邛花巴竹適滋思古之幽情乃者芸館含香蘭臺
撰史無雙席上畢探中祕之奇第七車邊大發瑤
華之采嘗取

欽定全唐文所收商隱駢體文錄之視今本多至
二百三首釐爲四冊名曰補編如窺豹斑而已得
其全譬探驪珠而悉騰其耀信體裁之咸具迺韜

晦之必彰緬惟顏魯公之佚篇留氏補之於宋蜀
韋莊之遺集毛氏補之於明俾賸馥與殘膏均霑
後學擬翼經而輔道無愧功臣据古方今何多讓
焉猥以錫蕃幼耽麤異汎涉羣書壯學蟲雕粗知
偶句卅載而編珠綴貝敢言清麗爲文千里而斷
梗飄蓬差同名宦不進屬爲校正其字弁言其端
嗟嗟蜀水湘雲總才人之落漠恩牛怨李亦季世
之譏彈而惟是上計淹車芳華拋瑟年年金綫祇
辦嫁衣朵朵紅蓮空妍府幕僅得此筆花退豔巢
鳥餘痕猶復香落溷中偕李賀而泯沒劍埋獄底
俟雷煥而鋒銛固由激傲恃才干造物之所忌亦
屬蹇屯遭遇極文士之同悲也竊濡穎而欻然願
鋟梨而雪此擗衣欲裂君幸能拾懶之殘托鉢誰

依我已覺抽蠶之盡

道光二十有七年歲在丁未夏四月烏程高錫蕃

撰

振倫按上令狐相公七狀是
楚非綱序中令狐二句微誤

自序

樊南文集原目不可見

四庫全書著錄乃崑山徐氏本藝初爲箋章仲爲注者也其文皆採自文苑英華凡一百五十首厥後桐鄉馮氏注出頗糾其箋注之誤而於篇目無甚出入其引明文瀾閣書目義山文集十冊崑山葉氏菴竹堂書目義山文集十一冊固疑其不止於此矣

振倫曩官京師恭誦

欽定全唐文七百七十一之七百八十二所收李

義山文較諸徐馮注本多至二百三首惜未知採

自何書曾手錄之咸豐改元以憂返里復偕弟

常分任箋注之役嗣見阮文達所譌胡書農學士

傳云從永樂大典錄出樊南佚文四百餘首乃恍

然於所由來而數尙不合亟從學士子次瑤孝廉
乞得錄本對校之則卽此二百三首其閒字句小
有異同亦藉以考定永樂大典今存翰林院敬一
亭悔未及對校又知文達所謂四百餘首者或合
徐本之百五十首約略言之非此二百三首外尙
有佚文二百首爲全唐文所未採也庚申賊擾江
浙倉卒渡江而北平生書篋悉付灰燼而此本居
然獨存展卷重觀如隔世事所注間有未備比因
主講袁浦同年吳仲宣漕帥富藏書獲從乞借補
注之編爲十二卷夫以振倫兄弟之譾陋上方徐
氏昆季誠不可道里計惟是頻年捃摭之功不忍
輕棄今茲稿本粗定尙冀有好事如馮氏者糾余
之失更合本集以成完書則此編其猶嚆矢也已

同治三年歲在甲子孟冬之月歸安錢振倫書

凡例

一徐馮注本雖由綴集而成但行世已久不得不謂之本集是編有與相涉者悉於題下注明以便互勘

一文首標題按其年月有必不可通者當爲傳鈔之誤今各疏所疑於下不敢擅易原題

一文有箋注例加於首見之篇惟王茂元一生仕履備詳於外舅司徒公文非詳引史傳則散見於前者轉難稽核故特立此變例

一帝虎魯魚書中恆有是編如張佚誤秩劉惔誤恢尙易辨也若雒陽之誤維揚廣漢之誤廣陵則似是而非必經妄人肥改茲就灼知者摘正之此外未注諸條固緣見書苦少抑

未必無點畫之譌也

一祭韋太尉文二首確爲符載之作故退一字別之仍依原第錄注其文以備參考

一王溪生詩題有彭陽公誌文本集文中所述有才論聖論奠牛太尉文補編文中所述有紫極宮銘馮氏引金石錄有佛頌全蜀藝文志有懷安軍碑記爲八戒和尚謝復三學山精舍表皆知其題而佚其文近人孫梅四六叢話內載義山修華嶽廟記云出華嶽集志今附卷末然亦未敢深信也

一馮氏王溪生年譜於無可取證之中旁搜互勘酌定年月用心亦良苦矣惟是編行狀等篇爲馮氏所未見故譜中不無臆斷而譌今

糾正數條附於書後

一 振倫

家乏藏書且罕知交是編初剋武康王

松齋孝廉

誠

曾爲蒐採數十條及其將成江

山劉彥清農部

履芬

又爲刪節數百條但遺

漏舛誤終不能免

大雅君子續有見示當

別爲補注一卷以志多聞之益

舊唐書文苑傳

李商隱字義山懷州河內人曾祖叔恆年十九登進士第位終安陽令祖備位終邢州錄事參軍父嗣商隱幼能爲文令狐楚鎮河陽以所業文干之年纔及弱冠楚以其少俊深禮之令與諸子遊楚鎮天平汴州從爲巡官歲給資裝令隨計上都開成二年方登進士第釋褐祕書省校書郎調補宏農尉會昌二年又以書判拔萃王茂元鎮河陽辟爲掌書記得侍御史茂元愛其才以子妻之茂元雖讀書爲儒然本將家子李德裕素遇之時德裕秉政用爲河陽帥德裕與李宗閔楊嗣復令狐楚大相讐怨商隱旣爲茂元從事宗閔黨大薄之時令狐楚已卒子綯爲員外郎以商隱背恩尤惡其